

Հաճախ տրվող հարցեր Ադրբեջանում ԿԽՄԿ-ի գրասենյակի փակման վերաբերյալ

14/08/2025 | GLOBAL VERSION

Կարմիր խաչի միջազգային կոմիտեն (ԿԽՄԿ) 1992 թվականից ի վեր ակտիվորեն գործել է Ադրբեջանում՝ արձագանքելով հակամարտությունից բխող մարդասիրական կարիքներին: Արդեն ավելի քան երեք տասնամյակ ԿԽՄԿ-ն տարածաշրջանում աջակցել է հակամարտությունից տուժած մարդկանց հրատապ և կենսական կարիքներին, տրամադրել է հոգեբանական աջակցություն տուժած համայնքներին, օգնել իշխանություններին պարզելու հակամարտության առնչությամբ անհայտ կորած անձանց ճակատագրերը, խթանել Միջազգային մարդասիրական իրավունքի կիրառումը և իրականացրել ծրագրեր՝ բարձրացնելու ականների վտանգների ու ապահով վարքագծի վերաբերյալ իրազեկվածությունը: Մենք նաև այցելել ենք հակամարտության առնչությամբ պահվող անձանց՝ վերահսկելու նրանց պահման պայմաններն ու նրանց նկատմամբ վերաբերմունքը, ինչպես նաև օգնելու պահպանել կապը իրենց ընտանիքների հետ: Մենք համագործակցել ենք Ադրբեջանի Կարմիր մահիկի ընկերության և Կարմիր խաչի և Կարմիր մահիկի ընկերությունների միջազգային ֆեդերացիայի հետ՝ մեղմելու հակամարտությունից տուժած համայնքների առջև ծառացած դժվարությունները:

Ինչո՞ւ է ԿԽՄԿ-ն փակում Ադրբեջանում իր գրասենյակը

Համաձայն Ադրբեջանի Հանրապետության իշխանությունների որոշման՝ ԿԽՄԿ-ն 2025թ. սեպտեմբերին կդադարեցնի իր ֆիզիկական ներկայությունը երկրում: Միաժամանակ, ԿԽՄԿ-ն հավատարիմ է մնում Միջազգային մարդասիրական իրավունքի ներքո պաշտպանություն ունեցող անձանց աջակցությանը և ներկայումս շարունակում է երկխոսությունը Ադրբեջանի իշխանությունների հետ մեր ապագա գործունեության շուրջ: Մեր ներգրավվածությունն ու ֆիզիկական ներկայությունը որևէ երկրում մշտապես պայմանավորված է տեղի իշխանությունների համաձայնությամբ: Հաշվի առնելով, որ իշխանությունների հետ մեր երկխոսությունը գաղտնի և երկկողմանի բնույթ է կրում՝ չենք մեկնաբանի այս քննարկումների վերաբերյալ մանրամասները:

Ի՞նչ գործունեություն է իրականացրել ԿԽՄԿ-ն Ադրբեջանում

Ավելի քան 30 տարի ԿԽՄԿ-ն Ադրբեջանում մարդասիրական միջավայրի մաս է կազմել՝ արձագանքելով հակամարտությունից տուժած անձանց փոփոխվող կարիքներին՝ առաջնահերթությունը տալով մարդկային արժանապատվությանը և համայնքների երկարաժամկետ տոկոսությունը:

Հենվելով իր մարդասիրական սկզբունքների՝ մարդասիրության, չեզոքության, անաչառության և անկախության, ինչպես նաև իր եզակի հանձնագրի վրա, որը սահմանվում է Ժնևի կոնվենցիաներով՝ ԿԽՄԿ-ն Ադրբեջանում մշտապես աշխատել է հակամարտությունից տուժած անձանց կարիքները հոգալու ուղղությամբ, այդ թվում՝ էսկալացիաների ժամանակ: ԿԽՄԿ-ի մարդասիրական գործունեությունը մշտապես հիմնվում է կարիքների համընդհանուր ըմբռնման և անմիջականորեն տուժած

համայնքների, իշխանությունների ու տեղի գործընկերների հետ ձևավորված հարաբերությունների վրա:

Քանի որ կազմակերպությունն ամփոփում է իր աշխատանքը Ադրբեջանում, այս տարիներին ձևավորված կապերը, համակարգերը և կուտակված փորձը շարունակելու են ազդել Ադրբեջանի իշխանությունների և Ադրբեջանի Կարմիր մահիկի ընկերության հետ մեր հետագա համագործակցության վրա:

1992 թվականից ի վեր ծավալված մեր գործունեության վերաբերյալ լրացուցիչ տեղեկությունների համար կարող եք ուսումնասիրել այս [լուսանկարների շարքը](#) և [ամփոփ տվյալները](#) (հասանելի է անգլերենով):

Ի՞նչ է լինելու այն համայնքների հետ, որոնց աջակցել եք Ադրբեջանում

Մենք հասկանում ենք, որ մեր գրասենյակի փակույթը կարող է անորոշության և մտահոգության առիթ հանդիսանալ այն ընտանիքների համար, որոնք իրենց պահվող հարազատների մասին լուր ստանալու հարցում ապավինում էին ԿԽՄԿ-ին: Այս գործառույթը ստանձնել են Ադրբեջանի իշխանությունները և շարունակելու են ապահովել այս անձանց ու նրանց ընտանիքների միջև կապը:

ԿԽՄԿ-ն շարունակում է հավատարիմ մնալ Միջազգային մարդասիրական իրավունքով հովանավորվող անձանց աջակցությանը: Մեր երկխոսությունը Ադրբեջանի իշխանությունների հետ շարունակվում է՝ համաձայն ԿԽՄԿ հանձնագրի և Ժնևի կոնվենցիաներով սահմանված պարտավորությունների:

Ադրբեջանում մյուս բոլոր գործողությունները, օրինակ՝ անհայտ կորած անձանց ընտանիքներին ցուցաբերվող աջակցությունը, փոխանցվել են ազգային իշխանություններին: Ադրբեջանի Հանրապետության Գերիների, պատանդների և անհայտ կորած անձանց հարցերով զբաղվող հանձնաժողովը շարունակելու է իրականացնել մարդկային աճյունների որոնմանն ու նույնականացմանն ուղղված աշխատանքները:

Մենք աջակցում ենք Ադրբեջանի և Հայաստանի պետական հանձնաժողովների միջև համագործակցությանը և հույս հայտնում, որ նրանց համատեղ ջանքերը երկար սպասված պատասխաններ կտրամադրեն անհայտ կորած անձանց ընտանիքներին: Որպես չեզոք միջնորդ, երկու կողմերի ցանկության դեպքում մենք պատրաստ ենք աջակցել նրանց միջև երկխոսությանը և գործողություններին:

Ինչպե՞ս կկարողանան Ադրբեջանում մարդիկ կապ հաստատել ԿԽՄԿ-ի հետ

ԿԽՄԿ-ի կողմից Ադրբեջանում իրականացված բոլոր գործողությունները կդադարեցվեն, իսկ մեր գրասենյակը կփակվի: Նախկինում Ադրբեջանում իրականացված մեր բոլոր

աշխատանքները, օրինակ՝ անհայտ կորած անձանց ընտանիքներին ցուցաբերվող աջակցությունը, փոխանցվել են ազգային իշխանություններին:

Հավելյալ հարցերի դեպքում խնդրում ենք այցելել ԿԽՄԿ-ի «[Հետադարձ կապ](#)» կայքէջ և գրել մեզ:

Դեռևս այն ժամանակ, երբ ԿԽՄԿ-ն իր գործունեությունն էր իրականացնում Ադրբեջանում, ես դիմել էի օգնության՝ իմ անհայտ կորած հարազատին գտնելու համար: Ի՞նչ զարգացում կունենա իմ դիմումն այսուհետ:

Մենք սերտորեն համագործակցել ենք Ադրբեջանի Հանրապետության Գերիների, պատանդների և անհայտ կորած անձանց հարցերով զբաղվող հանձնաժողովի հետ: Անհայտ կորած անձանց վերաբերյալ հավաքագրված ամբողջ տեղեկատվությունն ընտանիքների համաձայնությամբ փոխանցվել է Հանձնաժողովին: Վերջինս շարունակելու է իր գործունեությունը՝ ուղղված անհայտ կորած անձանց ճակատագրերը պարզելուն և ընտանիքներին պատասխաններ տրամադրելուն: Լրացուցիչ տեղեկությունների դեպքում կարող եք անմիջապես դիմել Հանձնաժողովին:

Ադրբեջանից դուրս հակամարտությունների առնչությամբ անհայտ կորած անձանց դեպքերի համար խնդրում ենք կապ հաստատել Ադրբեջանի Կարմիր մահիկի ընկերության հետ:

Հնարավո՞ր է, արդյոք, որ ԿԽՄԿ-ն ապագայում վերականգնի իր գործունեությունն Ադրբեջանում:

Որպես չեզոք մարդասիրական կազմակերպություն, մենք միշտ պատրաստ ենք իրականացնել մեր հանձնագիրը: ԿԽՄԿ-ի ներգրավվածությունն ու ֆիզիկական ներկայությունը յուրաքանչյուր երկրում պայմանավորված են տեղի իշխանությունների համաձայնությամբ:

Ի՞նչ կարգավիճակ ունեն հայ ազատագրված անձինք Ադրբեջանում: Արդյո՞ք նրանց այցելելը Ձեր հանձնագրի շրջանակներում չէ:

Մենք այցելել ենք հակամարտության առնչությամբ ազատագրված բոլոր անձանց, որոնց մասին մեզ պաշտոնապես տեղեկացրել են Ադրբեջանի իշխանությունները: ԿԽՄԿ-ն շարունակում է հանձնառու լինել Միջազգային մարդասիրական իրավունքով հովանավորվող անձանց՝ շարունակելով մեր հնարավոր հետագա գործունեության վերաբերյալ երկխոսությունը Ադրբեջանի իշխանությունների հետ: Միևնույն ժամանակ, հարկ է ընդգծել, որ որևէ երկրում պահվող անձանց այցելելու մեր կարողությունը կախված է բացառապես տվյալ երկրի իշխանությունների համաձայնությունից:

ԿԽՄԿ-ն հրապարակավ կբացատրի՝, թե ինչու են Ադրբեջանի իշխանությունները որոշել դադարեցնել կազմակերպության գործունեությունը:

Մենք իրավասու չենք մեկնաբանելու Ադրբեջանի իշխանությունների կողմից ընդունված որոշումը:

Ինչպե՞ս եք շարունակելու Հայաստանում անհայտ կորած անձանց ընտանիքների հետ աշխատանքը՝ ուղղված նրանց հարազատների ճակատագրերի պարզաբանմանը:

Անհայտ կորած անձանց և նրանց ընտանիքներին առնչվող մեր գործունեությունը Հայաստանում շարունակվում է: Այժմ մեր «Մատարում» ծրագրի միջոցով աջակցություն ենք տրամադրում այն ընտանիքներին, որոնց հարազատները շարունակում են անհայտ կորած մնալ 2020–2023 թթ. հակամարտության սրացումների հետևանքով: Մենք աջակցում ենք պետական մարմիններին, մասնավորապես՝ Հայաստանի Գերիների, պատանդների և անհայտ կորած անձանց հարցերով զբաղվող միջգերատեսչական հանձնաժողովի աշխատանքային խմբին, ինչպես նաև դատաբժշկական ծառայություններին՝ նպաստելով տեղեկատվության արդյունավետ փոխանակմանը և մասնագիտական կարողությունների ամրապնդմանը:

Մենք աջակցում ենք Ադրբեջանի և Հայաստանի պետական հանձնաժողովների համագործակցությանը և հույս հայտնում, որ նրանց համատեղ ջանքերը երկար սպասված պատասխաններ կտրամադրեն անհայտ կորածների ընտանիքներին: Որպես չեզոք միջնորդ, երկու կողմերի ցանկության դեպքում մենք պատրաստ ենք օժանդակել սույն երկխոսությանը և գործողություններին:

Շարունակելու՞ եք հաղորդակցվել Ադրբեջանում պահվող անձանց ընտանիքների հետ

ԿԽՄԿ պատվիրակությունը Հայաստանում կշարունակի հաղորդակցվել պահվող անձանց հարազատների հետ՝ իր դռները բաց պահելով նրանց առաջ, որոնք կցանկանան այցելել կամ զրուցել մեզ հետ: Միևնույն ժամանակ, մենք շարունակում ենք Ադրբեջանի իշխանությունների հետ մեր երկխոսությունը՝ հակամարտության առնչությամբ ազատագրված անձանց վերաբերյալ մեր հետագա գործունեության շուրջ: Զարգացումների դեպքում մենք այդ մասին կտեղեկացնենք ընտանիքներին:

Կպահպանի՞ ԿԽՄԿ-ն իր հարաբերությունները Ադրբեջանի Կարմիր մահիկի ընկերության հետ երկիրը լքելուց հետո

ԿԽՄԿ-ն և Ադրբեջանի Կարմիր մահիկի ընկերությունը Կարմիր խաչի և Կարմիր մահիկի ընկերությունների միջազգային շարժման անդամներ են: ԿԽՄԿ-ն հանձնառու է շարունակելու Ադրբեջանի Կարմիր մահիկի ընկերության հետ իր համագործակցությունը, որը ձևավորվել է տարիների համատեղ նվիրվածության և մարդասիրական գործունեության հիման վրա: